

TARIKH : 15 Ogos 2025
AKHBAR : Berita Harian
MUKA SURAT : 23

Ekonomi MADANI jamin taraf hidup bermaruah untuk rakyat

111 Jumaat, 15 Ogos 2025

Bisnes

23

Ekonomi MADANI jamin taraf hidup bermaruah untuk rakyat

Strategi bersifat naikan lantai, siling ekonomi pastikan akses kepada gaji wajar, perlindungan sosial

Oleh Mohd Zaky Zainuddin
zaky@bh.com.my

Pertumbuhan ekonomi dan fiskal bukan lagi menjadi satu-satunya elemen pengukur transformasi sosioekonomi negara, tetapi kini turut merangkumkan kemampuan memastikan taraf hidup bermaruah untuk semua rakyat, kata Menteri Kewangan II, Datuk Seri Amir Hamzah Azizan.

Justeru, katanya, kerajaan komited untuk membina sebuah negara yang adil, saksama dan berdaya tahan melalui kerangka Ekonomi MADANI menekankan maruah, keadilan serta kemakmuran bersama.

"Ekonomi MADANI membawa pembaharuan struktur yang nyata, daripada meningkatkan hasil pasaran buruh, menaikkan pendapatan isi rumah, merapatkan barisan pendapatan fiskal, hingga meningkatkan keberkesanan penyampaian kerajaan," katanya

ketika berucap pada Forum Hasanah 2025 bertemakan 'Philanthropy That Listens, Bridging Intent With Interventions' di Kuala Lumpur, semalam.

Yang turut hadir, Pengerusi Yayasan Hasanah, Tan Sri Md Nor Yusoff; Pengarah Urusan Khazanah Nasional Bhd (Khazanah), Datuk Amirul Feisal Wan Zahir dan Ketua Setiausaha Perbendaharaan Kementerian Kewangan, Datuk Johan Mahmood Merican.

Kerjasama semua pihak

Mengulas lanjut, Amir Hamzah menjelaskan, strategi itu bersifat menaikkan lantai dan siling ekonomi, memastikan semua rakyat mempunyai akses kepada gaji wajar, perlindungan sosial serta perkhidmatan awam berkualiti, sambil mengangkat daya saing negara, menarik pelaburan berkualiti tinggi dan memacu inovasi.

Katanya, usaha itu tidak akan berjaya tanpa kerjasama rapat antara kerajaan, industri swasta, sektor filantropi dan masyarakat sivil yang berperanan mengisi jurang yang tidak mampu dicapai pasaran.

"Filantropi perlu berlandaskan keperluan sebenar komuniti, iaitu apa yang mereka perlukan, impian dan mampu bina, bukan hanya bersifat mengumpul atau memaksa," katanya.

Beliau menegaskan, Malaysia melalui Ekonomi MADANI mem-



Amir Hamzah beramah mesra dengan peserta pada Forum Hasanah 2025 bertemakan 'Philanthropy That Listens, Bridging Intent With Interventions' di Kuala Lumpur, semalam. Turut kelihatan Md Nor.

(FOTO: MOHAMAD SHAHRIL BADRI SAALI/BH)

bayangkan sebuah negara di mana tiada rakyat yang ketinggalan, perkhidmatan sosial sampai ke golongan terpinggir dan alam sekitar dipelihara untuk generasi akan datang.

"Filantropi yang mendengar adalah kunci untuk mencapai visi ini dengan lebih cepat dan mampan," katanya sambil menekankan kepentingan Yayasan Hasanah sebagai penggerak utama agenda berkenaan.

Sebagai yayasan amanah Khazanah, Yayasan Hasanah sudah menyalurkan ratusan juta ringgit untuk program pendidikan, kelestarian alam sekitar, pembangunan komuniti, seni, budaya serta kesejahteraan masyarakat sejak ditubuhkan pada 2015.

Antara inisiatifnya termasuk Program Pendidikan Komuniti di kawasan pedalaman Sabah dan Sarawak, projek pemuliharaan hutan di Perak serta bantuan

kemanusiaan pasca bencana melalui kerjasama dengan rangkaian korporat dan pertubuhan bukan kerajaan (NGO).

Forum Hasanah 2025 yang memasuki edisi ketiga menghimpunkan pemimpin industri, pembuat dasar, NGO dan wakil komuniti bagi membincangkan strategi memperkuat peranan filantropi dalam membina Malaysia yang lebih adil, inklusif dan mampan.